

U skladu sa članom 7. Stavom (2) Zakona o kolektivnom ostvarivanju autorskog i srodnih prava (Službeni glasnik BiH 63/10), u skladu sa Statutom i internim aktima Asocijacije izvođača i svirača "AIS" (u daljem tekstu: Udruženje), a na osnovu ovlaštenja iz člana 27. Statuta Udruženja, Skupština Udruženja na sjednici održanoj dana 10.11.2021. godine, donosi

PRAVILNIK O FONDU ZA KULTURNE I SOCIJALNE NAMJENE

Član 1.

Pravilnikom o Fondu za kulturne i socijalne namjene (u daljem tekstu: Pravilnik) utvrđuju se uslovi, postupak, način prikupljanja sredstava, raspored i korištenje sredstava i ostvarivanje prava na sredstva iz Fonda za kulturne i socijalne namjene Udruženja (u daljem tekstu: Fond).

Član 2.

Fond čine sredstva koja se odlukom Skupštine Udruženja izdvajaju od naplaćenih izvođačkih muzičkih naknada, odnosno naknade za prava izvođača muzičkih djela i nosilaca prava za kulturne namjene i za unaprijeđenje zdravstvenog i socijalnog statusa članova Udruženja, a na temelju člana 7. Stava (2) Zakona o kolektivnom ostvarivanju autorskog i srodnih prava (Službeni glasnik BiH 63/10).

Član 3.

- (1) Od ukupno prikupljenih iznosa izvođačkih naknada po odbitku administrativnih troškova Udruženja i iznosa poreza (neto prihod od izvođačkih naknada) Udruženje može izdvojiti maksimalno do 10 % (deset) od neto prihoda za kulturna i socijalna davanja, u skladu sa odlukom Upravnog odbora i međunarodnim ugovorima.
- (2) Procentualni iznos izdvajanja u Fond će na prijedlog Upravnog odbora biti utvrđen na 1 (prvoj) redovnog sjednici Skupštine u kalendarskoj godini za prethodnu reparticionu godinu, prije izvršene raspodjele naknada.
- (3) Sredstva prikupljena za prethodnu kalendarsku godinu ulaze u masu za dodjelu iz sredstava Fonda u tekućoj kalendarskoj godini.
- (4) Omjer između sredstava određenih za kulturne i socijalne namjene može se mijenjati u okviru kalendarske godine u zavisnosti od potreba Udruženja.

Član 4.

- (1) Sredstvima Fonda upravlja Upravni odbor.
- (2) Za obavljanje tehničkih poslova oko provedbe ovog Pravilnika Upravni odbor može imenovati komisiju koja će predlagati način raspodjele ovih namjenskih sredstava.
- (3) O korištenju sredstava iz Fonda Upravni odbor Skupštini Udruženja podnosi godišnji izvještaj.

Član 5.

- (1) Upravni odbor raspisuje konkurs za dodjelu sredstava iz Fonda i objavljuje ga na službenoj web stranici Udruženja.
- (2) Oblasti i kriteriji koji su obuhvaćeni konkursom:
 - Muzičko stvaralaštvo (stimulacija domaćeg muzičkog stvaralaštva);
 - Muzičke manifestacije (organizovanje festivala, tribina posvećenih novim djelima i naučnih skupova čija je tematika od značaja za domaće muzičko savremeno i tradicionalno stvaralaštvo);
 - Muzičko izdavačko stvaralaštvo (izdavanje promotivnih kompakt diskova, objavljivanje partitura od značaja za muzičku kulturu, objavljivanje analitičkih studija i publikacija koje su od značaja za domaće muzičko stvaralaštvo).
- (3) Pravo da konkurišu za sredstva iz Fonda imaju sva pravna i fizička lica sa teritorije Bosne i Hercegovine koja ispunjavaju uslove konkursa (u daljem tekstu: Aplikant)
- (4) Aplikant koji namjerava koristiti sredstva iz Fonda dužan je Upravnom odboru uputiti prijavu za dodjelu sredstava iz Fonda (u daljem tekstu: Prijava).
- (5) Prijava mora sadržavati:

a) kratak opis programa/projekta iz kojeg mora biti vidljivo da se ostvaruje svrha iz člana 2. ovog Pravilnika;

b) podatak ili potvrdu iz koje je vidljivo da li je program/projekt sufinansiran i iz nekog drugog izvora ako postoji (npr. fonda, donacija ili na temelju nekog drugog konkursa).

c) izjavu Aplikanta kojom se isti obavezuje da će program/projekt realizovati u određenom roku;

d) saglasnost izvođača muzičkih djela/nosilaca izvođačkog muzičkog prava za realizaciju muzičkih djela koja su sadržana u programu/projektu, a organizatori festivala je mogu naknadno dostaviti, do potpisivanja ugovora sa Udruženjem.

e) izjavu Aplikanta kojom se isti obavezuje da će u svim promotivnim nastupima u javnosti Udruženje biti pomenuto verbalno, na štampanom, promotivnom i svakom drugom materijalu, kao i da će logo Udruženja biti zastupljen na cjelokupnom promotivnom materijalu koji prati realizaciju programa/projekta.

(6) Prijava se podnosi Udruženju u roku od mjesec dana od dana objavljivanja konkursa. Svaki aplikant može prijaviti samo 1 (jedan) projekat. Projekti započeti i realizirani prije objave Javnog konkursa, neće biti uzeti u obzir.

Član 6.

(1) Pravo na sredstva za socijalne namjene iz Fonda imaju članovi Udruženja, po osnovu zdravstvene ugroženosti ili po osnovu socijalne ugroženosti.

(2) Sredstva iz predhodnih Stavova dodjeljuju se u vidu novčane pomoći (u daljem tekstu: Pomoć)

(3) Pomoć se članu Udruženja može odobriti samo jednom u toku kalendarske godine i to samo po jednom od osnova iz Stava 1. ili stava 2. ovog člana

Član 7.

(1) Pravo na pomoć članu Udruženja ili bračnom drugu i/ili maloljetnoj djeci na temelju zdravstvene ugroženosti može se tražiti u slučajevima: iznenadne i teške bolesti, bolesti koja zahtijeva skupo liječenje ili hiruški zahvat, bolest koja zahtijeva kupovinu ortopedskih pomagala.

(2) Zahtjev za pomoć iz Fonda na temelju zdravstvene ugroženosti se podnosi u pisanoj formi koja, između ostalog, sadrži: preciznu dijagnozu sa potpisom i pečatom ljekara specijaliste, stručno mišljenje ljekara o težini oboljenja, prognozu razvoja i eventualnog izlječenja bolesti, ne stariju od 6 mjeseci.

Član 8.

(1) Odluku o dodjeli sredstava iz Fonda na temelju prijedloga komisije donosi Upravni odbor.

(2) Nepotpune izjave iz člana 5. stava (4) ovog Pravilnika, odnosno prijave koje ne sadrže potrebnu prateću dokumentaciju iz člana 5. stava (5) ovog Pravilnika, Upravni odbor neće razmatrati.

Nepotpune zahtjeve iz člana 7. ovog Pravilnika, odnosno zahtjeve koji ne sadrže potrebnu prateću dokumentaciju iz člana 7. stava (2) ovog Pravilnika, Upravni odbor neće razmatrati. Projekti komercijalne i profitabilne prirode, odnosno objavljivanje albuma pojedinačnih izvođača za koje se procjeni da nemaju dodatnu društvenu vrijednost, neće biti podržani.

(3) Pri donošenju odluke o raspodjeli sredstava posebno će se voditi računa o:

- Ukupnoj masi sredstava koja je u trenutku odlučivanja prikupljena u Fond;
- Da se konkursna prijava odnosi na područje umjetničkog i kulturnog stvaralaštva, njegovanja muzičke tradicije, aktivnosti muzičkog izvođača, muzičke djelatnosti uopće, vodeći računa o izvrsnosti i kvaliteti, žanrovskoj muzičkoj raznolikosti i regionalnoj zastupljenosti;
- Penzionom, zdravstvenom i socijalnom statusu članova Udruženja, vodeći računa o izvrsnosti i kvaliteti, žanrovskoj muzičkoj raznolikosti i regionalnoj zastupljenosti;
- Ranije odobrenim sredstvima korisnicima koji apliciraju više puta, pri čemu Upravni odbor može odbiti prijavu iz člana 5. i zahtjev iz člana 7. ovog Pravilnika, ukoliko su korisniku ranije odobrena sredstva.

(4) Odluka Upravnog odbora je konačna.

Član 9.

(1) Krajnji rok za realizaciju programa/projekta je 30. novembar naredne (ili tekuće) godine.

(2) Rok za pravdanje troškova realizacije programa/projekta je 31. decembar naredne (ili tekuće) godine.

- (3) Ukoliko podnosilac programa/projekta do 31. decembra naredne (ili tekuće) godine ne opravda utrošena sredstva, u obavezi je da cjelokupan iznos vrati Udruženju.
- (4) U slučaju posebno opravdanog i dokazanog razloga, a po dobijenoj odluci Upravnog odbora, može se produžiti navedeni rok.
- (5) Ukoliko podnosilac programa/projekta ne preuzme dobijena sredstva, ne može ih potraživati nakon isteka roka iz stava (1) ovog Člana.

Član 10.

- (1) Sredstva iz Fonda koja nisu utrošena u toku jedne kalendarske godine moguće je prenijeti na sljedeću godinu.
- (2) Upravni odbor preostala sredstva može unijeti u namjene predviđene ovim Pravilnikom.


Član 11.

- (1) U slučaju smrti člana Udruženja, isplata novčanih sredstava na ime pomoći najbližim članovima njegove porodice vrši se iz Fonda.
- (2) Maksimalan iznos sredstava iz stava (1) ovog člana je 2.000,00 KM netto.
- (3) Odluku o visini sredstava iz stava (2) ovog člana donosi Upravni odbor.
- (4) Novčana pomoć iz stava (1) ovog člana za maloljetno dijete preminulog člana Udruženja isplaćuje se mjesečno, sve do početka školovanja djeteta, u iznosu od 100 KM netto.
- (5) S početkom školovanja djeteta, pomoć iz prethodnog Stava isplaćuje se u vidu stipendije, sve do kraja obrazovnog ciklusa.


Član 12.

Danom donošenja ovog pravilnika, prestaje da važi Pravilnik o fondu za kulturne i socijalne namjene broj:P1-05/18 od 19.04.2018. godine.

Broj:SK P14-05/21
Vogošća, 10.11.2021. godine



AIS



Damir Bečić, zamjenik predsjednika Skupštine